






Call. 706











1621

12. Jan 1712

L. 24050

DISCOVRS
POLITIQUE,
SUR LES OCCVRRENCES
ET MOUVEMENTS
de ce temps.

M. DC. XXI.

Case

F

39

THE NEWBERRY
LIBRARY

.326

1621fa



DISCOVRS POLITIQUE, SVR
les occurrences & mouuements
de ce temps.

POUR n'estre dans les affaires, ie ne laisse pas de les sentir, & ne me tiens pas quitte du serment que i'ay au Roy, criminel au contraire si ie ne m'en explique, quand ie les voy nommément en danger de nous rouler dans le precipice, Muet donc que i'ay esté iusques icy, voyant ma patrie en ce peril, le poignard approchant de sa gorge, ma langue comme de cet enfant, force tous les liens, ie m'eschappe à moy-mesme & ne puis que ie ne m'en escrie.

Toutes guerres sont à redouter, mais plus les ciuiles que les estrangeres, entre les ciuiles celles qui se font du faict de Religion, comme les fiéures plus ou moins dangereuses selon les parties ou elles ont leur siege, si toutesfois elles s'attachent aux esprits, obstinees & difficiles à esteindre, fort proches d'incurables.

C'est pourquoy les plus sages Princes nous ont laissé pour maxime, *Religionem imperare non possumus*, il n'est point de nostre pouuoir de commander la Religion, vne creance diuine ne ploye point sous les loix humaines, aussi peu sous les rigueurs & sous les peines, pour le peu de proportion & de relation qu'il y a entre les

deux. Le rasoir certes peut entamer la teste, mais iusques à l'esprit, iusques à ceste partie de l'esprit, de laquelle est le siege de la Religion, pour affilé qu'il soit il ne penetre point.

Bien est-il vray que sur la naissance des differens en la Religion en nos iours, quelques grands Princes estimerent les pouuoir estouffer par la rigueur de leurs loix, mesme par la force de leurs armes. Et ainsi en maladies incognuës tente on à l'aduanture tous remedes. Mais comme ils eurent esprouué que le feu & le fer n'y auançoient rien, ils changerent bien tost de batterie, de corrosifs passerent aux lenitifs, de batailles en Conferences, en Interims, en paix de Religion, quelques succès qu'en apparence ils eussent veus de leurs premiers efforts: & se resolurent vne bonne fois de tolerer ce qu'ils ne pouuoient tollir sans vne totale ruine.

Tesmoins en soient ces grands Empereurs Charles V. Ferdinand I. Maximilian II. lesquels non seulement en l'Empire, mais mesmes de tous leurs Estats patrimoniaux laissoient la Religion libre, & se seruoient indifferement de leurs subiets de toutes qualitez, & bien heurieuse l'Allemagne tandis que leurs successeurs se sont contenus dans ces limites.

Pour nos Rois que n'ont-ils fait à ces commencemens, pour preuenir la difference en la Religion, y a-il supplice qui n'y ait esté employé, qui n'ait rebousché à l'encontre, tant que l'an 1561. en pleine paix, en celebres Estats sous le Roy Charles IX. par vn Ediët solemnel,

5

meurement delibéré, concerté en vne Assemblée des plus notables du Royaume à Paris, la liberté de la Religion fut accordée, & si on en fut demeuré là, les bigareures dont nous nous plaignons en cét Estat, places de seureté, conflicts de Iurisdiccions ne fussent pas. Quelques-uns pour faire les zelez violenterent cette liberté, la partie estoit desia si forte qu'il en falut venir aux armes, dont peu de temps apres on se repentit, & fut rendue la liberté à ceux de la Religion contraire. Mais quelques annees apres l'Espagne par l'entreueuë de Bayonne nous encouragea de rompre cét Edict, nous prestant mesme son espee pour nous en donner dans le corps, s'en ensuiuit vne bataille deuant Paris où Anne de Montmorency Connestable de France fut blessé dont il mourut. Ses derniers mots à la Royne Catherine de Medicis le visitant au liët de la mort, sont dignes de demeurer engrauez és cœurs de tous les bons François. *Faiçtes la paix, Madame, faiçtes la paix, les plus courtes folies sont les meilleures.* Notez entre les douleurs de sa playe, les angoisses de la mort, qui naturellement l'eussent peu porter à la vengeance.

Mais ce sage & grand Cheualier estoit au dessus de tout cela, auoit reconnu que la maladie auoit passé trop auant, sçauoit considerer qu'il y en a de si enracinees, enfiltrees & incorporees és plus nobles parties soit de l'homme, soit de l'Estat, qu'elles font partie en quelque façon & de sa santé & de sa vie, ne pouuant

icelles estre arrachees qu'avec la destruction & extinction du total.

Ie laisse les tentatiues que nous auons fait du depuis , car qui les pourroit ou dire ou lire, sans horreur, & qui ne se doit souuenir quantesfois & en quantes façons ; cét Estat en a esté sur le bord du naufrage, & cependant que nous en est-il reuenu. Certes nous deurions pieça estre resolu sur cette question, & en faire leçon aux autres , tenir pour axiome inuariable en ce Royaume de ne remuer plus le faict de Religion, declarer criminel de leze Majesté du premier chef, qui esgratigneroit tant soit peu les Edicts de nos Rois sur ce suiet, comme attendant à la personne , Couronne & Estat de nostre Prince. Mais si nous sommes aueuglez iusques-là de la remettre encores sus , Dieu vueille inspirer le Roy pour bien choisir ceux qu'il aura à consulter , gens recommandez de sagesse & d'experience, gens attachez d'affection & d'obligation à sa prosperité , qui en somme ne soient interessez qu'au bien de son seruice.

I'honore Messieurs du Clergé comme ie dois, & recognoy entr'eux plusieurs grands personnages doüez de parties & qualitez requises pour conseiller vn grand Roy, mais ils me pardonneront si ie leur dy, que d'eux mesmes par conscience, non que par bien seance, ils se doiuent soustraire de ceste deliberation, par ce que leur serment principal est au Pape partie formelle en ceste cause ; par ce que leurs

voix sont desia preiugees & engagees à ses desirs, à ses commandemens pour ne pouuoir opiner au contraire, par ce que ceux qui entrent en vn Conseil, y doiuent venir en intention d'apprendre les vns des autres, que ceux cy ia resolu ne peuuent, par ce qu'icy est question de peser les inconueniens d'une guerre civile, pertes de biens, maisons, vies, enfans, familles, toutes de peu de poids & de consideration à qui vit sur l'autrui, n'a rien de propre, n'est obligé au soin de l'aduenir; par ce qu'en vne Republique bien instituee ne furent iamais appelez en Conseil de guerre ceux qui n'y vont point, prodigues du peril d'autrui, quand ils n'y ont point de part; par ce qu'ils font profession de ne se mesler d'aucun affaire, où il aille du sang, & à quoy tend la guerre sur tout la civile, qu'à le resprendre; parce en fin qu'il y va de la manutention de ceste Couronne en son entier, & ceux de cet ordre n'ont point faict scrupule en pleins Estats de la rendre subalterne en certains cas, la personne mesme de nos Rois au Tribunal de Rome. Conclut partant sous leur respect qu'il y a lieu en cet endroict, si iamais en aucun autre de dire, icy, *Fuora Preti*, ce que ces sages Venitiens, ne pratiquent pas seulement contre ceux qui sont *in sacris*, mais tous autres qui leur sont obligez de sang ou d'interest, autrement y auroit lieu de pretexte de nullité contre toute l'action, de laquelle ils auroient faict partie.

Les Iesuites ne seront peut-estre pas si ef-

frontés que de s'y ingerer, car ils font leurs affaires plus finement, parlent en l'aureille, là où on ne leur peut contredire: Mais tant plus à nostre Roy à s'en garder. Car és Conseils vne raison combat l'autre, & icy ils plaident sans partie; les plus anciens Conseillers opinent en leur rang, bien souuent apprennent des icunes, & icy ils decident tous seuls, qui pis est font cas de conscience de tout. Et plus ils treuuent vne ame tendre, craintive & pieuse, plus entreprennent ils d'y imprimer leurs opinions, disons plustost leurs desseins concertez ailleurs & d'ailleurs, sous ombre de Religion contre le bien de cet Estat. Car qui pourra croire autrement, puis que par leur institution leur General ne peut estre qu'Espagnol, leur General auquel ils iurent vne obeyssance aueugle, & cependant ils sont aujourd'huy tenus pour la quint'essence du Clergé, au lieu que nostre Sorbonne, qu'ils ont indignement supplantée, composée de bons François, en estoit anciennement l'oracle.

Qui consultera donc nostre Roy en vne matiere si importante? Certes les vieux Officiers de la Couronne, les vieux Capitaines de ce Royaume, gens signalez en batailles & en sieges, qui ont par maniere de dire vesçu durant & apres le Deluge, eu loisir de comparer les maux de la guerre, avec les biens de la paix. Et luy diront, que iamais guerres ne furent demenees avec plus de vigueur, plus de rigueur que celles de la Religion entre-nous, trois victoires

viâtoires telles fois obtenues en vne annee, trente mil hommes de qualite en diuerses villes tuez presque en vn iour, tous leurs chefs esgorgez en vn matin, & de dessous ce carnage neantmoins à peu de temps de là, ils les auroient veu reuiure, reprendre leurs esprits, retourner au combat, nous reduire à traiter de plus belle.

Vn pretendu zelateur nous entre-coupera icy, que ce fut manque de deux poissettes de sang, car c'est leur stile, faute, veulent-ils dire, d'auoir compris en la S. Barthelemy le Roy de Nauarre & le Prince de Condé. Mais malheureux que deuenoit donc la race Royale de Bourbon, restauratrice de cét Estat, & ou seroit nostre Roy, ou ce Royaume, ou peut estre toy mesme ? Représenteront d'abondant à sa Majesté, que souuent vne bataille gânee seroit perdue en vn siege, vne place auroit cousté vn million à prédre, qui à quinze iours de là auroit esté surprise pour cent sols d'eschelles : que pendant qu'on en forçoit vne en quelque Prouince avec grand perte d'hommes, toute vne saison se consumoit, és autres Prouinces on en surprénait trois ou quatre. Et de là toutes ces villes de seureté qui leur sont demeurees en garde, tant le desespoir des attaquez a d'auantage contre l'indifference de ceux qui les assaillent; Qu'une bicoque en fin de Liuron en Dauphiné auroit arresté & ruiné vne armee toute fresche du Roy Henry II. retournant de Pologne, quantes fois repentant de n'auoir creu ce sage Empereur Maximilian II. les Venitiens & les

Ducs de Ferrare & de Sauoye, chez qui il auoit passé, qui luy conseilloyent d'entrer en housse, & non la lance sur la cuisse en son Royaume.

Quelque ieune Capitaine voudra icy flatter nostre Roy, & luy dira, mais en l'aureille, car tout haut commel'oseroit-il? que c'est vn Conseil de vieux Gaulois, qui ne sçauent que le vieux ieu, que ce qui est le plus petit en luy, est plus gros que les reins de ses peres; Mais ils ne trouueront pas vn Roboan en nostre Roy, qui n'ignore point ce que les ans apprennent; sous ombre de quelque petit tour fait en Hollande, peut-estre mesme durant la trefue, d'où ils rapportent quelque mot nouveau, nos ieunes gens pensent deuenir Capitaines, auoir desrobé toute la science, toute l'experience du pays; Mais il y a bien de la façon à faire vn Prince Maurice.

Consultera nostre Roy les vieux Conseillers d'Estat, qui ont blanchi dans les affaires sous les feux Rois, tesmoins non moins de leur repentirs que de leurs desseins, qui luy diront quantes fois ils ont cherché en intention de ruiner ceste Religion, tantost la guerre dans la paix, tantost la paix dans la guerre, alternatiuement las & recreus de l'vn & de l'autre; à quantes reprises sous diuerses esperances ils sont retournez aux armes pour diuers degousts rebutez mesmes de leur succez, sont reuenus aux traictez tant que de formais nous ne pouuons plus coter ny le quantiesme de nos troubles, ny le quantiesme de nos Edicts; qu'à peine ont ils iamais veu la

guerre allumee six mois, qu'on n'en maudist l'heure, qu'on ne courust à l'eau pour l'esteindre, bien qu'assistez des forces & d'Italie & d'Espagne qui tousiours ont gayement contribué à nostre embrasement. Mais qui plus est luy feront remarquer qu'avec toutes nos victoires, nous sommes tousiours allez en declinans, les derniers Edicts encherissans tousiours à l'aduantage de ceux de ceste Religion, par dessus les premiers. Et la dessus prene enuie à sa Maiesté de se faire apporter les Edicts de Ianuier 1561. & de Nantes 1598. Cestuy là faict és Estats d'Orleans, sous Charles IX. sur les simples requestes par eux presentees, cestuy cy sous Henry le grand son pere, confirmatif en pleine paix des precedens, qu'ils auoient obtenu des feux Rois aprestant d'efforts, & les daigne sa Majesté comparer ensemble, là où elle verra de quoy nous aurons seruy à l'aduancement de la Religion quarante ans de persecution, & autres quarante ans de troubles. Et delà pourra solidement iuger du progrez qu'elle doit attendre des Conseils violents. Car en cestuy là n'estoit question que d'un simple exercice de Religion, qui leur estoit accordé és faubourgs des villes en sortant des feux. Ce qu'il y a de surplus és autres confirmé par ce dernier, nous le deuons à nos animositez, inhumanitez, desloyautez, en danger de pareil succez, si nous suiuous semblables voyes; voyes certes qu'ils conclurront auoir esté agreables à Dieu, nostre zele estant apparemmét si bon, puis qu'elles ont

abouti tout au contraire.

Et quelle raison, quelle caution, qu'elles puissent mieux reussir à l'aduenir. Car quant à ceux qui pour nous rendre les choses plus plausibles pontillent sur les fautes qu'ils prétendent auoir esté faits de la poursuite des choses entreprises, tantost blasmans l'impatience de nostre nation, tantost la conuiuece de quelques vns qui y auroient esté employez, tantost les accidens qui seroient venus à la tranerse, ie leur demanderois volontiers s'ils ont trouué quelque recepte pour fixer nostre vis-argét, pour disposer de nos mœurs ou de nos humeurs à leur fantaisie, pour maistriser en somme les constellations du monde, ces accidens dont ils se plaignent.

Consultera en fin sa Majesté sur le nerf de ceste guerre, Messieurs les Sur-intendans, Tresoriers & Receueurs généraux de ses Finances, qui luy diront, qu'il se leue en ce Royaume quatre fois autant, qu'és temps des Rois François premier & Henry second, & qu'à peine en reuient-il le quart és coffres de sa Maieité. Que sous le Roy Charles IX. le Royaume estoit opulent, le peuple à son aise, nonobstant les grandes guerres estrangeres, qui auoient exercé ces deux Rois precedens, depuis que la ciuile à l'instigation de quelques furies fut introduite, on n'ouyt plus parler que d'engager le Domaine du Roy, & iusques aux bagues de la Couronne, ses aydes, ses gabelles, ses tailles, de creation & multiplication d'Officiers, d'aduís de partis, d'Edits fiscaux, de mots & de maux nouveaux.

& inoüis en ce Royaume, dont est arriué que le Roy du plus florissant Estat de la Chrestienté despoüillé de ce beau Domaine, & de ces grâds reuenus qui souloient entretenir en paix & en guerre les grands predecesseurs, au moyen des charges qui les deuorent, le plus opulent Royaume de l'Europe est reduit à viure non plus du suc, mais du sang de son pauvre peuple, peuple si deshalé, si descharné, que qui le rencontre par les champs à peine y peut-il recognoistre face d'homme, & à mesure que les troubles ont redoublé, on redouble les charges, sans que les interualles de paix en ayent rien rabatu, chaque année, chaque iournee, sans aucun esgard, sans proportion, adioustant à sa misere de telle sorte, que de Laboureur qu'il estoit du sien, il ne l'est tantost plus que de l'autrui, & pour autrui, pour le bourgeois & habitant des villes: taxé neantmoins à l'esgard de ce qu'il cultiue, & cela sçauent ceux qui font leurs cheuauchees par les Eslections, qui en deussent acquitter leurs consciences. Que qui fait les vins & les bleds, ne boit que de l'eau, ne mange que du pain d'auoine; Que qui nourrit & paist les troupeaux, ne sçait plus que c'est d'estre vestu de laine; Que le paylan pour la pluspart couche sur la paille, portes & fenestres ouuertes, en perpetuelle alarme en pleine paix, d'un Sergent qui luy saisit iusques à la thuile, adioustez tant soit peu au faix de ce pauvre peuple & il donnera du nez en terre; Ains qu'il ayt seulement à supporter trois mois vne guerre licenciense, comme elle est, (&

autre ne peut-elle estre au siecle où nous viuons) & il abandonnera mesme la terre : vne miserable consolation nous en peut reuenir, que par ce moyen la guerre s'estranglera d'elle-mesme, comme nous en auons veu quelque eschantillon en ces mouuements derniers.

Le mal est que nous cachons cela à nos Princes, ne les pourmenons volontiers que par les Palais, ne leur y montrons que les beaux canaux, les riches grotes, & ne leur disons pas combien de pauures gens en ont croupy, & en ont pourry dans les cachots, combien de pauvretes ont contribué à ce luxe, de necessité à ceste superfluité,

Ne s'imaginent icy les bonnes villes d'estre exemptes de ceste misere, le Bourgeois si la feste dure n'aura point à se glorifier sur le payfan, il luy arriuera comme au cheual d'Eslope, le payfan accablé sous le faix, le bourgeois portera l'une & l'autre charge, ils verront leurs maisons desertes, leurs Metairies rauagees, leur fauxbourg bruslez, leur commerce trauersé, toutes leurs fonctions troubles, la terre pleine de voleurs, la mer de corsaires, ie laisse les excès & violences des gens de guerre, qui ne reçoient ny estimation, ny amande, mais encores en demeureroient elles là : ains elles n'orront plus parler que d'emprunts, mais à iamais rendre ; de subsides, mais pour iamais n'estre esteints, d'entrees, d'issuës, de maletostes sur toutes denrees qui se consomment, sur toutes estoffes qui s'employent. On nous introduira tout ce que l'Ita-

lien a inuenté pour assouuir sa cupidité, tout ce que le Hollandois supporte pour la necessité de sa defense, & nous n'aurons pas faute de bons esprits pour en adiouster d'autres. Paris, le doux seiour de nos Rois, l'honneur de ce Royaume, s'en ira decheant à veuë d'œil, par l'absence de son Prince, disons de son ame, le loüage sans locataire, l'artisan sans employ, l'herbe se verra au Palais, en la grande Sale à dix heures on iouera aux quilles; Lors maudira-on, mais il sera trop tard, qui aura porté ses conseils à la guerre; Et cependant deuons nous auoir oublié, que par mesmes conseils sous espoir d'exterminer ceux de ceste Religion, nous fusmes engagez en la sedition, obligez à chasser nos Magistrats, nostre Roy mesme, reduits en fin à deux sieges l'un apres l'autre, au dernier iusques à manger les enfans, ains si Bernardin de Mendoze eust esté creu, les os de nos peres. Quelque friuole consolation nous viendra peut-estre à la trauerse, quelque miserable enseigne pout nous attacher à la vouste de Nostre-Dame, on nous crierà la prise de quelque villoche, qu'en vain nous chercherons en la Carte: Mais combien faut-il de tels emplastres pour couvrir nostre playe.

La Noblesse certes, ie l'aduoue, pour la profession qui luy est naturelle, auroit plus de sujet de desirer la guerre: mais quelle guerre? contre le Turc pour replanter nostre Oriflan dans les terres des infideles, disons mesme contre quelque voisin, qui eust pris ou retenu iniustement le nostre, eust peut-estre encores dessein

d'enuahir ce qui nous reste. Mais és brigandages que nous auons veus, où est le bon cœur qui puisse tant soit peu subsister, & que voyons nous aussi s'y attacher, sinon pour la pluspart gens affamez, banqueroutiers, preuenus de iustice, mal en leurs affaires, capables de tous partis, de celuy tant plus ou y aura moins de iustice, plus de licéce, car de se pouuoir imaginer qu'en vne guerre ciuile se puisse reestabli la iustice, il est du tout contre le sens commun. Tous nos vieux Capitaines y ont perdu leur temps, se sont rendus en fin à la corruption, les ieunes, la corruption eux mesmes, qu'y pourroient-ils faire? Car ce mot ancien n'est que trop vray, vne vraye guerre ne peut subsister sans police, la police sans chastiment, le chastiment sans solde, la solde sans fonds, le fonds sans reuenus certains; Faites les tarir, & autrement ne se peut-il en la guerre ciuile, tarie aussi tost toute iustice discipline, police; Entrent à flot toutes sortes de desbauches, de vices, d'insolences, de violences.

On nous dit icy, que ce sont des difficultez forgees à plaisir, que le fond de ceste guerre fondee sur vn si grand zele, vn zele de Dieu, ne se peut espuiser, que ce puissant, cét opulent Clergé la defrayera, la soldoyera, se peut-il dire ou sans pleurer ou sans rire? Et est-il possible que nous prenions tant de plaisir à nous tromper? Gens qui mangent la pluspart leur bled en verd, qui festinent dix-huit mois l'annee, gens de luxe & de delices, de qui on a peine de tirer la reparation de leurs Eglises, seront mescrus de rabatre

de rabatre de leurs aises pour soudoyer vne armee, & de gayeté de cœur, & sans necessité contre personnes qui ne leur nuisent point. Certes il n'y a celuy donc qui ne voye clairement, que par ces arrhes, on nous veut engager à ce marché, & cherchez apres qui le tiendra. Ils n'auront pas payé vn quartier, qu'ils ne s'en resiliant, qu'ils ne nous demandent ou les clefs de la Rochelle, ou la teste mesme de l'heresie, a moins ne voudroient ils auoir fait ceste despense. Il nous faudroit precipiter les exploicts, pour les contenter contre raison, contre saison, enuoyer nostre Noblesse aux assauts pour le prix de leur argent. Les affaires allans de long, & qui en doute? ils nous payeront de non-valleurs, & de Dioceses affligez en Dauphiné, Languedoc, Guyenne, Xaintonge & ailleurs. Les Euesques de ce qu'ils auront contribué se vengeront sur les Curez, les Abbez sur les Religieux, les grands brochets sur les moindres; Recours en fin à vne croisade, ou on nous fera acheter à deniers comptans le soulagement, ou le salut des ames de nos peres, en danger qu'il s'esleue là dessus quelque nouveau Luther qui en descouure l'abus, en scandalise l'vsage, nous iette en quelque nouveau schisme, & lors malheur sur qui aura attaqué ceste escarmouche.

Et quant à ces affronteurs qui promettent vn fonds qui ne coustera rien à personne, renuoyons les en vn mot par ceste maxime de Philosophie, *ex nihilo nihil fit*. de rien ne se fait rien en la nature. Toutes leurs inuentions ne peu-

uent estre qu'aux despens ou du Roy ou du peuple ; ne tondent plus, mais escorchent, mais emportent la piece, ventes de Domaines, d'aydes, de tailles, de gabelles, vn vingtiesme, vn quarantiesme, vn soixantiesme de la taille, douze sols six deniers pour minot de sel, augmentations de droitz aux Greffes, &c. Car tout cela qu'est-ce sinon la substance du peuple de laquelle aujourd'huy il faut que le Roy viue ; Et ce fonds vne fois ou espuisé ou diminué par les grandes sommes qu'à grands & enormes interests on emprunte, là dessus que s'ensuit-il sinon que nous soyons contrains de faire vn nouveau Domaine au Roy pour fournir, soit aux ornemens de sa personne, soit aux charges de son Estat, & ou le prendre sinon là où il y en aura, le peuple ruiné, dans le Clergé, dans la Noblesse. Et quand bien il sera directement imposé sur le tiers Estat, sommes nous si hebetés que de n'auoir comprins en tant d'annees, que la saignée se fait en son bras, mais que tous les membres y contribuent, tous les Ordres du Royaume en sa personne, & sous son nom sont imposez, sont en effect taillables. Ainsi nous veulent ces bons esprits traiter en ieunes gens, à qui on fait trouuer argent pour leurs plaisirs à perte de Finances, & leur fait-on croire qu'ils en sont bien obligez ; Mais au bout du terme il faut payer & le credit & la marchandise estimée au double, & le mal est que le Moulin ou la Mettayrie y demeure.

Icy on nous vient à la trauerse ; Vous ne par-

lez que de moyens naturels, ne mettez vous donc point en compte les miracles qui accompagnent ceste guerre sainte, car que devons nous attédre moins que l'espee de sainte Catherine du Fierbois, baudriers tombans du ciel, lances fleuries, sur tout puis que les Iesuites s'en meslent, qui en ont fait de si estranges aux Indes, qui après les portes ouuertes a Nauarrins, ne nous promettent pas moins que de fendre le Iordain sous leurs pieds, faire fondre les murs de Ierico au son de leurs trompettes? Certes de ce qu'il ont fait aux Indes ie m'en rapporte, me suffit de sçauoir qu'ils n'ont peu empescher que les Hollandois n'y regnent, & en leurs Moluques mesmes. Mais pour demeurer en nostre Europe, ie n'ay récognu autre miracle d'eux sinon que par leurs conseils & monopoles ils ont faict perdre au Roy de Poulongne la Couronne de Suede, mis en grand hazard à Ferdinand tous les Estats & anciens patrimoines de la maison d'Autriche, troublé nostre France sous Henry III. de sorte qu'elle en vint sur le bord du naufrage, garentie par la seule vertu du Roy Henry le Grand, & encor en doit-on quelque gré à ceux qui luy assisterent; suscité par leur doctrine contre sa vie des Barrieres, des Chastels, des Rauailacs, tant en fin, hélas! qu'elle y est demeuree, & encores n'en peut-on estouffer la semence. Que Dieu pardonne à la sapience de feu Monsieur le President de Harlay, qui ne voulut pas percer ce rare don d'oubliance du Pere Aubigny, tant nous auons peur d'en sça-

C ij

uoir trop ; Sages Venitiens , qui auez sceu sans tant d'experience, vous deffaire pour iamais de ceste engeance. Et ce prudent Paul V. quantes-fois a-il dit, ces gens par leur violence ruyneront l'Eglise ; Car quant au Roy d'Espagne ce qu'il en fait ne rabat rien de sa prudence, ces bons Peres luy sont autant de viperes priuees, qui ne mordent que là ou il luy plaist.

Mais laissons là dites-vous ces miracles, vous nous exagerez les difficultez, & nous taisez les facilitez, car y eut-il iamais si beau ieu ? Ils n'ont plus de Prince du sang pour chef & protecteur, qui leue les ialousies entre leurs grands, qui les rallie : Ains estimes-tu donc du seruice du Roy de les reduire à en chercher ? Et leur veux-tu mal de ce qu'ils n'en veulent autre que le Roy ? Et si tu les portes à l'extremite doutes-tu qu'ils n'en trouuent & dans toy mesme ? Ils sont diuisez, dis-tu, il y a paru en ce qu'ils ont pris en ces mouuements diuers partis ; mais certes en faict d'Estat & non de Religion ; Tant y a qu'ils n'ont entr'eux ne procez ne querelles, en faict d'Estat chacun peut auoir son sentiment, mais où il y va de la Religion, du peril commun, tu les verras tous en vn moment, courir à mesme enseigne. Et si tu penses donc que leur diuision & mes-intelligence nous soit vtile, pourquoy ne la laisses-tu courir ? Pourquoy les rappelle-tu à concorde, & par argumens si concluans, si necessaires ? Quand ils seront tous ensemble, diras-tu, ils ne sont qu'une poignee de gens : Nous en sçauons le nombre, les conditions, les qualitez ;

Mais tu ne t'aduise pas d'un erreur de calcul; combien de milliers ils en ont entre nous, qui se rangeront avec eux (& te souuienne icy des exemples passez) qui attacheront leurs mescontentemens, leurs intereſts ciuils ou inciuils aux neceſſitez, aux iuſtes douleurs de ceux que tu veux ruyner, & mets la main ſur la conſcience; Ausquels pour le bien de l'Eſtat aymerois-tu mieux auoir affaire; En fin il n'y a plus d'Elizabeth, de Cazimir pour leur fournir vne armee Eſtrangere, l'Allemagne eſt occupee en elle meſme, le Roy de la Grande Bretagne bien empeſché à ſecourir ſon gendre, premier qu'ils y puiffent arriuer ſ'en feroit fait: Et donc ſi tu trouues tant d'aduantages en ceſte guerrelà, pourquoy le Roy eſt-il conſeillé de courir au feu pour l'eſteindre, d'y enuoyer vn Duc d'Angoulesme pour y porter del'eau; Penſes-tu qu'on luy face iouer vne farce ſur vn tel Theatre, ou ſi c'eſt à bon eſciant, comme de faiſt il eſt, vois-tu pas que ſon ſage conſeil en iuge tout autrement que toy, trop bien inſpiré, pour procurer la paix au loin, ſe reſerue chez ſoy la guerre en partage; Adiouſtons qu'és troubles ſurnommez de la Ligue ſous Henry III. és années 86. 87. nous auions des eſtrangers, & eux non, leur iettaſmes tout à la fois ſix armées ſur les bras en diuerſes Prouinces, qui n'auoient point faute de bons chefs, les Ducs de Guyſe, de Mayenne, de Ioyeuſe, d'Eſpernon, Mareſchaux de Biron, de la Châtre, &c. & ne laiſſerent iceux toutes-fois de nous gagner la bataille de Contras,

apres mesme que leur armee estrangere fut def-
faite de nous venir prendre tout le Poictou, de
nous faire peur iusques à Tours, dont s'ensuiuit
la bien heureuse trefue.

Icy recours à l'accoustumee aux accidens;
Que tous ieux ne se rencontrent pas; à quel-
que cornuë cassée à la façon des Alchimistes, &
tant cela ils estoient à bout de leur Magistere:
Mais apres auoir soufflé tant d'annees en vain,
& que ne fust-ce qu'en vain, apres tant de per-
tes, de dommages, ains tant de sang respandu,
qui diueroit bien ailleurs, qui se fiera plus en leurs
promesses?

Certes il est donc tout clair que le but de ces
gens qui rendent les choses si faciles, n'est autre
que d'engager vne fois le Roy, peu soucieux
quelle en sera l'issuë pour la Religion, pourueu
que nostre Estat se consume en troubles, & ce
pendant ne doutons point que sa Maiesté ne
soit la premiere à s'en rebuter, à reprocher ce
conseil aux authéurs, & lors on s'entre-regar-
dera, nul n'en aura esté d'aduis, chacun du con-
traire, quand il verra le feu en la maison de son
voisin de quelque costé qu'il se tourne, tous ses
deniers gourmandés en ses receptes soit gene-
rales que particulieres, sans que rien vienne en
son Espargne, autant de Roys que de Prouin-
ces, que de Bailliages, qui s'affriandiront tant
dans l'autorité par la force qu'ils auront acqui-
se de nostre foiblesse, qu'il n'y aura plus moyen
de les en faire demordre, quelque nouuelle quel-
ques fois luy sera apportee avec grand applau-

diffement d'une bicoque prise, d'une cornette
 deffaite: mais saupoudree le pl^o souuēt de la per-
 te de quelque seruiteur vtile, de quelque coup
 fourré, qui luy en fera perdre le goust, & en
 tout cas que luy seront mesmes ses triumphes,
 que funerailles? Quand il verra, qui pis est, le
 plus dangereux voisin de son Estat faire profit
 de nos calamitez, gagner cependant pays dans
 la Chrestienté suborner ou supplanter ses al-
 liez, nous bloquer, nous cerner de toutes
 parts, en attendant que bresche raisonnable luy
 soit ouuerte, que ses pratiques soient prestes à
 ioüer, car qui ne suit icy comme à la trace le
 vœu & le conseil du Cardinal Bellarmin pour la
 Monarchie Vniuerselle, & quel plus court
 chemin pour y paruenir que l'affoiblissement
 de nostre Roy, la disposition de l'Estat, qui seul
 au iugement d'un chacun luy fait obstacle, alors
 parlerons-nous de remparer contre son inua-
 sion, mais la ruine sera des-jà sous nos pieds,
 des-jà sera terminee la meslee, ceux qui teme-
 rairement auront accroché nos nauires, ne s'en
 pourront plus desdire, s'en aduiseront trop
 tard, lors qu'il ne restera plus moyen que de
 s'entrebrusler, miserable ressource, le victorieux
 avec le vaincu, l'un par le desespoir de l'autre,
 ie dis, desespoir, par ce que ceux de ceste Reli-
 gion ayans souffert le feu par quarante ans, &
 toute la rigueur du fer par autres quarante, &
 depuis rendu au feu Roy toutes preuues de fi-
 delité en la recouffe & de sa personne & de sa
 Couronne, mesmes depuis s'estre fait Catho-

lique: vescu aussi avec nous & nous avec eux assez pour nous entre-cognoistre, pour nous appriuoiser les vns avec les autres, & s'ils se voyent apres tant de souffrances & de labeurs, n'auoir peu affermir la liberté de leurs consciences, & la seureté de leurs vies, estre au contraire rappelez à leurs principes, ramenez sous la persécution par l'infraction de si solemnels Edicts, ne pourront plus esperer repos par aucunstraittez, seront partant capables de tous conseils, & chacun sçait combien sont dangereux ceux auxquels la necessité preside; iustifiez par ce dire commun, que qui se noye se prend à vn fer chaud.

Ce sont direz vous inconueniens, mais qui ne soluent pas l'argument; car faudra-il donc qu'à iamais nous supportions ceste Religion, & en quelle conscience? Certes si tu auois donc le grand Seigneur, tu nous ferois vn terrible ravage, tu nous voudrois donc qu'il exterminast toutes ces Eglises Chrestiennes de son Empire, en la Romanie, en la Natolie, en l'Afrique qui montent plus que les nostres, voudrois-tu qu'il razat le S. Sepulchre, crucifie les Calogeres nos Moynes de l'Ordre S. Basile, dont est peuplé le mont Athos, combien plus sage, plus humain, plus charitable qui les laisse viure, leur donne mesme pension annuelle à ce qu'ils prient pour la prosperité de son Empire: Mais si tu és retenu de quelque scrupule, qui te le peut mieux soudre que le Pape, le Pape qui donne loy à ta conscience, qui neantmoins sous-

sous vn certain tribut permet les synagogues aux Iuifs, & publiques & priuees dans Rome mesmes, aux Iuifs qui font mestier de blasphemer la foy de Iesus, de blasonner le nom de sa glorieuse mere, au lieu que ceux dont est question, croient vn mesme Dieu, n'esperent salut qu'en Iesus-Christ, adorent vne mesme Trinité, honorent la sainte Vierge, reglent leur foy par mesmes escritures, reclament vn mesme esprit, aspirent en mesme heritage. Et combien seroit-il plus seant à ceux de nostre Clergé de resider en leurs charges, de prescher par paroles & par exemples, de reformer eux mesmes les abus qui sont entre-nous, car qui les pent nier? Certes prescher en halecret & guerroyer en surplis sont choses également ineptes & ridicules, & chacun faisant sa vocation se peut promettre la benediction de Dieu, craindre sa malediction au contraire, Adioustez les aduantages que nous auons de nostre part au regard des aduersaires, les faueurs, les autoritez, les graces qui dependent du Roy, les Magistrats, Superieurs, inferieurs, qui nous tiennent la main, les biens, les honneurs, les dignitez, les venerations qui nous releuent en nos personnes, releuent nos actes avec cela, pourueu que d'ailleurs le fonds y soit, que ne devons nous pouuoir, que ne devons nous faire: Que si ton pretendu zele laisse encores quelque place à la prudence, d'où peux-tu mieux en prendre loy que de ces grands Empereurs de la maison d'Autriche, qui ont finy leurs guerres de Religion

par vne paix, vne paix qui la laissoit libre à tous leurs subiects, car de quel droit nous voudras-tu imposer ce ioug, que nous soyons ou plus Catholiques qu'eux, à qui il est loisible de les supporter, ou s'il faut ainsi parler plus Papistes que le Pape mesme, à qui c'est Saincteté de maintenir les Iuifs, le Pape certes qui n'est point si transporté de ioye d'auoir veu ceux de ceste Religion chassés de la Valtoline, bien que sous son estendart par les armes d'Espagne, que l'apprehension n'encherisse par dessus, que ce progres ne vienne à la diminution de son autorité, dont est qu'il requiert nostre Roy de s'employer vers le Roy Catholique à ce qu'il remette les choses au premier estat, & de mesme tous les Princes d'Italie, le Pape aussi qui n'est point à son aise de ces tentatiues n'agueres faites par les Turcs au Royaume de Naples par diuerses descentes, esquelles ils ont donné des indices d'y vouloir prendre pied ferme, qui n'ignore point que delà avec peu de contradiction, ils peuuent enfilier leur chemin iusques aux portes de Rome, en danger que ces Propheties qui nous sont tant reprochées, se visissent accomplies en nos iours. Donc qu'auons nous à attendre sinon que ce Printemps, il nous presche la paix entre les Catholiques, la trefue aux heretiques, membres pourris, nous aura-il dit tant de fois, membres à reiecter & retrancher, mais ores supportables, ores necessaires, ores salutaires à la Chrestienté, lors qu'il va du sien, & pourquoy non dès maintenant qu'il y va

du nostre.

Mais deboutez qu'ils font du zele de l'Eglise, ils rentrent par l'interest de l'Estat, & non sans colere, car de quelle patience disent-ils, souffrir ces atteintes qui se donnent à l'autorité du Roy, ces assemblees sans breuet de permission, mesmes contre sa defense, A quoy ie ne diray pas ce qu'ils nous sçauent respondre, qu'il leur auoit esté promis en se separant de Loudun, qu'en cas d'inexecution des choses promises dans les six mois, il leur seroit procuré vn breuet avec effet pour se rassembler, & se pouruoir vers sa Maiesté par remonstrances. Mais ie vien au fonds, Prenons garde que ce que nous leur imputons à entreprise ne leur vienne plustost d'apprehension, ce que nous interpretons à peu de respect, à trop de crainte, Car d'où vient donc que du temps du feu Roy ces assemblees se faisoient si paisiblement, se separoient si facilement, que si vtilement il s'en sçauoit seruir pour maintenir le repos, & qu'aujourd'hui elles soient reputées pour instrument de troubles, certes la raison de la difference n'est difficile à treuuer, le feu Roy qui auoit esprouué leur fidelité par tant d'annees, en tant de perils & de l'Estat & siens, les cognoissoit iusques aux entrailles, se confioit en eux, se seruoit indifferemment d'eux, & vne confiance engédre l'autre, sur tout estoit tres-resolu de couper la racine à tous troubles pour la Religion, eux tres-persuadez, qu'il n'abhorroit rien plus que de voir ou violer ou chicaner ses Edicts, & de fait il auoit fait choix en

tre les seigneurs de son Conseil, de ceux qu'il recognoissoit plus équanimes pour iuger les difficultez qui en resultoient, y admettoit mesmes quelques vns de leur profession, pour estre tesmoins de l'équité, qu'il vouloit estre obseruee en l'interpretation, en l'inexecution, aussi de sa bonne & prompte iustice. Nous au contraire, qu'auons nous faict depuis que Dieu le nous a rai, sinon déclaré à ces gens en nos actions plus solennelles, que nous leur gardions *animum redeundi*, vne resolution de troubler leur condition, de retourner à la persecution, quand l'occasion y escherroit; Quand és Estats Generaux du Royaume, esquels nous deussions auoir eu pour but de consolider la Paix, nous auons presté la publication & execution du Concile de Trente, sans vouloir aucunement admettre l'exception des Edicts faits en leur faueur, auons qui pis est fait si grande instance au Roy d'accomplir le serment fait à son Sacre, concernant l'extirpation des Heretiques, avec pareil refus de la limitation qu'ils y demandoient, car quel autre sens y peut on donner, sinon que nous visions par là directement à leur extermination & ruine à laquelle on pretendit deslors d'obliger les trois Estats du Royaume. Quand en plein Parlement, lors qu'il estoit question de la reception des Officiers de leur profession en si graue compagnie, tant de voix sanglantes se sont eschappées sur ce subiect, tesmoins irreprochables du mal que plusieurs d'entre nous leur couuoient en leur cœurs: Afin que ie ne die rien de ce der-

nier exploict de Bearn, auquel chastiant sa Majesté l'obstination des Bearnois, l'animosité de quelques-vns a poussé le razoir si auant contre le bon naturel du Roy, qui peu de iours auparauant auoit magnifié sa clemence entant de sortes, qu'il a esté aisé de distinguer ce qui estoit du sien ou de l'autrui, veu les raisonnables conditions que parauant S. M. leur auoit accordees, & de là les vacarmes de nos prescheurs, qui ne parloient pas moins que d'en faire au premier iour comme en Espagne des Morisques, Apres cela qui trouue estrange que quelques vns se cabrent, qu'il faille du temps pour les ramener, leur remettre la bouche, leur rassurer la teste.

A ces maux direz-vous quels remedes? Certes en la seule bonté & iustice du Roy, ils se trouueront & suffisans & prompts. Il est du deuoir que ces gens ployent sous l'autorité de ses volonteiz. Mais voyons aussi s'il n'est point de son seruice de ne la roidir pas insques au bout. Il plaist à Dieu duquel il est icy l'image de condescendre quelquefois à nos imperfections, à nos infirmitiez. Qu'ils soient veus vne fois d'un bon œil du Roy, qu'ils ressentent qu'il se fie en eux, toutes murailles luy seront ouuertes, non que les portes, vne ferme resolutiō de ne prester iamais l'aureille aux conseils qui luy pourroient estre donnez cōtre leur liberté, leur seureté, que le feu Roy tenoit pour sacrées, & inuiolables, vn commandement serieux à tous ses Officiers, superieurs & inferieurs de se rendre sincerement in-

terpretes, diligens executeurs de ses Edicts, car nous sçauons assez tous, qu'ils ne demandent ny partage ny appanage en ce Royaume, ne veulent auoir que leurs ames pour butin, plus interessez en la manutention de l'autorité de sa M. qu'aucuns de ses subiets, car à vray dire, qui les fait supporter en la pluspart de nos villes sinon icelle seule? Que pleust à Dieu peussions nous dire le mesme de tous autres, lors seroit de faict S. M. reclamé pere commun de tous ses subiets, reueré de ses bons alliez, & redouté de ses ennux, digne Arbitre & Medecin recogneu par tous des maux de la Chrestienté, qui en l'Estat qu'il a pleu à Dieu luy commettre estimé le plus malade de l'Europe, ait donné vn tel eschantillon de sa sagesse, fait vne si excellente & miraculeuse cure. Que Dieu par sa grace me la doint voir, Que de bon cœur ie diray alors mon *Nunc dimittis*, pour passer de ceste vie à vne meilleure, autrement celle-cy ne me peut estre que tres amere.

